

南無本師釋迦牟尼佛（三稱）

摩訶般若波羅蜜經卷第二十三

大方便品第六十九

爾時須菩提白佛言：世尊！是菩薩摩訶薩，如是方便力成就者，發意已來幾時？佛告須菩提：是菩薩摩訶薩，能成就方便力者，發意已來，無量億阿僧祇劫。須菩提言：世尊！是菩薩摩訶薩，如是成就方便力者，為供養幾佛？佛言：是菩薩成就方便力者，供養如恆河沙等諸佛。須菩提白佛言：世尊！菩薩得如是方便力者，種何等善根？佛言：菩薩成就如是方便力者，從初發意已來，於檀那波羅蜜無不具足，於尸羅波羅蜜、羼提波羅蜜、毗梨耶波羅蜜、禪那波羅蜜、般若波羅蜜，無不具足。須菩提白佛言：世尊！菩薩摩訶薩，成就如是方便力者，甚希有！佛言：如是如是！須菩提！菩薩摩訶薩成就如是方便力者，甚希有。須菩提！譬如日月周行照四天下，多有所益；般若波羅蜜亦如是，照五波羅蜜，多有所益。須菩提！譬如轉輪聖王，若無輪寶，不得名為轉輪聖王，輪寶成就故，得名為轉輪聖王；五波羅蜜亦如是，若離般若波羅蜜，不得波羅蜜名字，不離般若波羅蜜故，得波羅蜜名字。須菩提！譬如無夫婦人，易可侵陵；五波羅蜜亦如是，遠離般若波羅蜜，魔若魔天，壞之則易。譬如有夫婦人，難可侵陵；五波羅蜜亦如是，得般若波羅蜜，魔若魔天，不能沮壞。須菩提！譬如軍將鎧仗具足，鄰國強敵所不能

壞；五波羅蜜亦如是，不遠離般若波羅蜜，魔若魔天，若增上慢人，乃至菩薩旃陀羅，所不能壞。須菩提！譬如諸小國王，隨時朝侍轉輪聖王；五波羅蜜亦復如是，隨順般若波羅蜜。譬如眾川萬流，皆入於恆河，隨入大海；五波羅蜜亦如是，般若波羅蜜所守護故，隨到薩婆若。譬如人之右手，所作事便，般若波羅蜜亦如是；如人左手造事不便，五波羅蜜亦如是。譬如眾流，若大若小俱入大海，合為一味；五波羅蜜亦如是，為般若波羅蜜所護，隨般若波羅蜜，入薩婆若，得波羅蜜名字。譬如轉輪聖王四種兵，輪寶在前導，王意欲住，輪則為住，令四種兵，滿其所願，輪亦不離其處；般若波羅蜜亦如是，導五波羅蜜，到薩婆若，常是中住，不過其處。譬如轉輪聖王四種兵，輪寶在前導；般若波羅蜜亦如是，導五波羅蜜，到薩婆若住。般若波羅蜜，亦不分別：檀波羅蜜，隨從我，尸羅波羅蜜、羼提波羅蜜、毗梨耶波羅蜜、禪波羅蜜，不隨從我。檀波羅蜜亦不分別：我隨從般若波羅蜜，尸羅波羅蜜、羼提波羅蜜、毗梨耶波羅蜜、禪波羅蜜，不隨從。尸羅波羅蜜、羼提波羅蜜、毗梨耶波羅蜜、禪波羅蜜，亦如是。何以故？諸波羅蜜，性無所能作，自性空，虛誑如野馬。

爾時須菩提白佛言：世尊！若一切法自性空，云何菩薩摩訶薩行六波羅蜜，當得阿耨多羅三藐三菩提？佛告須菩提：菩薩摩訶薩行六波羅蜜時，作是念：是世間心皆顛倒，我若不

行方便力，不能度脫眾生生死。我當為眾生故，行檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜。是菩薩為眾生故，捨內外物，捨時作是念：我無所捨。何以故？是物必當壞敗。菩薩作如是思惟，能具足檀波羅蜜。為眾生故，終不破戒。何以故？菩薩作是念：我為眾生發阿耨多羅三藐三菩提，若殺生，是所不應；乃至我為眾生發阿耨多羅三藐三菩提，若作邪見，若貪著聲聞辟支佛地，是所不應！菩薩摩訶薩，如是思惟，能具足尸羅波羅蜜。菩薩為眾生故不瞋心，乃至不生一念。菩薩如是思惟：我應利益眾生，云何而起瞋心？菩薩如是，能具足羼提波羅蜜。菩薩為眾生故，乃至阿耨多羅三藐三菩提，常不生懈怠心。菩薩如是行，能具足毗梨耶波羅蜜。菩薩為眾生故，乃至得阿耨多羅三藐三菩提，不生散亂心。菩薩如是行，能具足禪波羅蜜。菩薩為眾生故，乃至阿耨多羅三藐三菩提，終不離智慧。何以故？除智慧，不可以餘法度脫眾生故。菩薩如是行，能具足般若波羅蜜。須菩提白佛言：世尊！若諸波羅蜜，無差別相，云何般若波羅蜜，於五波羅蜜中，第一最上微妙？佛告須菩提：如是如是！諸波羅蜜，雖無差別，若無般若波羅蜜，五波羅蜜不得波羅蜜名字，因般若波羅蜜，五波羅蜜，得波羅蜜名字。須菩提！譬如種種色鳥，到須彌山王邊，皆同一色；五波羅蜜亦如是，因般若波羅蜜，到薩婆若中，一種無異；不分別是檀波羅蜜，是尸羅波羅蜜，是羼提波羅蜜，是毗梨耶波羅蜜，是禪波羅蜜，是般若波羅蜜。

何以故？是諸波羅蜜，無自性故，以是因緣故，諸波羅蜜無差別。須菩提白佛言：世尊！若隨實義，無分別，云何般若波羅蜜，於五波羅蜜中，最上微妙？佛言：如是如是！須菩提！雖實義中無有分別，但以世俗法故，說檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜。為欲度眾生生死，是眾生實不生不死，不起不退。須菩提！眾生無所有故，當知一切法無所有；以是因緣故，般若波羅蜜，於五波羅蜜中，最上最妙。須菩提！譬如閻浮提眾女人中，玉女寶第一最上最妙；般若波羅蜜亦如是，於五波羅蜜中，第一最上最妙。須菩提白佛言：世尊！佛以何意故，說般若波羅蜜最上最妙？佛告須菩提：是般若波羅蜜，取一切善法，到薩婆若中，住不住故。須菩提白佛言：世尊！般若波羅蜜，有法可取可捨不？佛言：不也！須菩提！般若波羅蜜，無法可取，無法可捨。何以故？一切法，不取不捨故。世尊！般若波羅蜜，於何等法，不取不捨？佛言：般若波羅蜜，於色不取不捨，於受想行識，乃至阿耨多羅三藐三菩提，不取不捨。世尊！云何不取色，乃至不取阿耨多羅三藐三菩提？佛言：若菩薩不念色，乃至不念阿耨多羅三藐三菩提，是名不取色，乃至不取阿耨多羅三藐三菩提。須菩提言：世尊！若不念色，乃至不念阿耨多羅三藐三菩提，云何得增益善根？善根不增，云何具足諸波羅蜜？若不具足諸波羅蜜，云何得阿耨多羅三藐三菩提？佛告須菩提：若菩薩不念色，乃至不念阿耨多羅三藐三菩提，是時善根增益；善根

增益故，具足諸波羅蜜；諸波羅蜜具足故，得阿耨多羅三藐三菩提。何以故？不念色，乃至不念阿耨多羅三藐三菩提時，便得阿耨多羅三藐三菩提。世尊！何因緣故，色不念時，乃至阿耨多羅三藐三菩提不念時，便得阿耨多羅三藐三菩提？佛言：以念故，著欲界色界無色界，不念故無所著。如是須菩提！菩薩摩訶薩，行般若波羅蜜，不應有所著！世尊！菩薩摩訶薩，如是行般若波羅蜜，當住何處？佛言：菩薩摩訶薩如是行，不住色，乃至不住一切種智。世尊！何因緣故，色中不住，乃至一切種智中不住？佛言：不著故不住。何以故？是菩薩，不見有法可著可住。如是須菩提！菩薩摩訶薩，以不著不住法，行般若波羅蜜。

須菩提！若菩薩摩訶薩作是念：若能如是行，如是修，是行般若波羅蜜，我今行般若波羅蜜，修般若波羅蜜；若如是取相，則遠離般若波羅蜜，若遠離般若波羅蜜，則遠離檀波羅蜜，乃至遠離一切種智。何以故？般若波羅蜜，無有著處，亦無著者，自性無故。菩薩摩訶薩，若復如是取相，則於般若波羅蜜退；若退般若波羅蜜，則是退阿耨多羅三藐三菩提，不得受記。菩薩摩訶薩，復作是念：住是般若波羅蜜，能生檀波羅蜜，乃至能生大悲。若作是念，則為失般若波羅蜜；失般若波羅蜜者，則不能生檀波羅蜜，乃至不能生大悲。菩薩若復作是念：諸佛知諸法無受想故，得阿耨多羅三藐三菩提。菩薩若作如是演說，開示教詔，則失般若波羅蜜。何

以故？諸佛於諸法，無所知、無所得，亦無法可說，何況當有所得！無有是處！須菩提白佛言：世尊！菩薩行般若波羅蜜，云何無是過失？佛言：若菩薩摩訶薩行般若波羅蜜，作是念：諸法無所有、不可取，若法無所有不可取，則無所得。若如是行，為行般若波羅蜜。若菩薩摩訶薩，著無所有法，則遠離般若波羅蜜。何以故？般若波羅蜜中，無有著法故。須菩提白佛言：世尊！般若波羅蜜遠離般若波羅蜜耶？檀波羅蜜遠離檀波羅蜜耶？乃至一切種智遠離一切種智耶？世尊！若般若波羅蜜遠離般若波羅蜜，乃至一切種智遠離一切種智，菩薩云何得般若波羅蜜？乃至得一切種智？佛言：菩薩摩訶薩行般若波羅蜜時，不生色，是色誰色，乃至一切種智不生，是一切種智誰一切種智。如是菩薩能生般若波羅蜜，乃至能生一切種智。復次須菩提！菩薩摩訶薩行般若波羅蜜時，不觀色，若常若無常，若苦若樂，若我若非我，若空若不空，若離若非離。何以故？自性不能生自性，乃至一切種智，亦如是。若菩薩摩訶薩行般若波羅蜜，如是觀色，乃至觀一切種智，能生般若波羅蜜，乃至能生一切種智。譬如轉輪聖王，有所至處，四種兵皆隨從；般若波羅蜜亦如是，有所至處，五波羅蜜皆悉隨從，到薩婆若中住。譬如善御駕駟，不失平道，隨意所至；般若波羅蜜亦如是，御五波羅蜜，不失正道，至薩婆若。

須菩提言：世尊！何等是菩薩摩訶薩道？何等是非道？佛言

：聲聞道，非菩薩道；辟支佛道，非菩薩道；一切智道，是菩薩摩訶薩道。須菩提！是名菩薩摩訶薩道、非道。須菩提言：世尊！諸菩薩摩訶薩，般若波羅蜜，為大事故起，所謂示是道、是非道。佛言：如是如是！須菩提！般若波羅蜜，為大事故起，所謂示是道、是非道。須菩提！是般若波羅蜜，為度無量眾生故起，為利益阿僧祇眾生故起。般若波羅蜜雖作是利益，亦不受色，亦不受受想行識；亦不受聲聞辟支佛地。須菩提！般若波羅蜜，是諸菩薩摩訶薩導，示阿耨多羅三藐三菩提，能令離聲聞辟支佛地，住薩婆若。般若波羅蜜，無所生、無所滅，諸法常住故。須菩提言：世尊！若般若波羅蜜，無所生、無所滅，云何菩薩摩訶薩行般若波羅蜜時，云何應布施？云何應持戒？云何應修忍？云何應勤精進？云何應入禪定？云何應修智慧？佛告須菩提：菩薩摩訶薩念薩婆若應布施，念薩婆若應持戒、忍辱、精進、禪定、智慧。是菩薩摩訶薩持是功德，與眾生共之，應迴向阿耨多羅三藐三菩提。若如是迴向，則具足修六波羅蜜，及慈悲心，諸功德。須菩提！若菩薩摩訶薩，不遠離六波羅蜜，則不遠離薩婆若。以是故，須菩提！菩薩摩訶薩，欲得阿耨多羅三藐三菩提，應學應行六波羅蜜；菩薩摩訶薩行六波羅蜜，具足一切善根，當得阿耨多羅三藐三菩提。以是故，須菩提！菩薩摩訶薩，應習行六波羅蜜！須菩提言：世尊！云何菩薩摩訶薩，應習行六波羅蜜？佛言：菩薩摩訶薩，應如是觀：色不合不散，受想行識不合不散，乃至一切種智，不合不散

；是名菩薩摩訶薩習行六波羅蜜。復次須菩提！菩薩摩訶薩應作是念：我當不住色中，不住受想行識中，乃至不住一切種智中；如是應習行六波羅蜜。何以故？是色無所住，乃至薩婆若無所住。如是須菩提！菩薩摩訶薩，以無住法，習行六波羅蜜，應當得阿耨多羅三藐三菩提。須菩提！譬如士夫，欲食菴羅果，若波那婆果，當種其子，隨時溉灌守護，漸漸生長，時節和合，便有果實，得而食之。須菩提！菩薩摩訶薩，亦如是，欲得阿耨多羅三藐三菩提，當學六波羅蜜：以布施攝取眾生，持戒、忍辱、精進、禪定、智慧，攝取眾生，度眾生死。如是行，當得阿耨多羅三藐三菩提。以是故，須菩提！菩薩摩訶薩，欲不隨他人語，當學般若波羅蜜！欲淨佛國土、成就眾生，欲坐道場，欲轉法輪，當學般若波羅蜜！須菩提白佛言：世尊！應如是學般若波羅蜜耶？佛言：菩薩應如是學般若波羅蜜。欲於諸法得自在，當學般若波羅蜜！何以故？學是般若波羅蜜，於一切諸法中得自在故。復次須菩提！般若波羅蜜，於一切諸法中最大。譬如大海，於萬川中最大；般若波羅蜜亦如是，於一切諸法中最大。以是故，諸欲求聲聞辟支佛，及菩薩道，應當學般若波羅蜜，檀波羅蜜，乃至一切種智。須菩提！譬如射師，執如意弓箭，不畏怨敵；菩薩摩訶薩，亦如是，行般若波羅蜜，乃至一切種智，魔若魔天，所不能壞。以是故，須菩提！菩薩摩訶薩，欲得阿耨多羅三藐三菩提，應學般若波羅蜜！是行般若波羅蜜，菩薩為十方諸佛所念。須菩提白佛言：世尊！云

何十方諸佛，念是菩薩摩訶薩？佛告須菩提：菩薩摩訶薩，行檀波羅蜜時，十方諸佛皆念；行尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜時，十方諸佛皆念。云何念？布施不可得，持戒忍辱精進禪定智慧不可得，乃至一切種智不可得。菩薩能如是不得諸法故，諸佛念是菩薩摩訶薩。復次須菩提！諸佛不以色故念，不以受想行識故念，乃至不以一切種智故念。須菩提言：世尊！菩薩摩訶薩多有所學，實無所學。佛言：如是如是！須菩提！菩薩多有所學，實無所學。何以故？是菩薩所學諸法，皆不可得。

須菩提白佛言：世尊！佛所說法，若略若廣。於此法中，諸菩薩摩訶薩，欲求阿耨多羅三藐三菩提，六波羅蜜，若略若廣，應當受持親近讀誦；讀誦已，思惟正觀，心心數法，不行故。佛告須菩提：如是如是！菩薩摩訶薩，略廣學六波羅蜜，當知一切法略廣相。須菩提言：世尊！云何菩薩摩訶薩，知一切法略廣相？佛言：知色如相，知受想行識，乃至知一切種智如相，如是能知一切法略廣相。須菩提言：世尊！云何色如相？云何受想行識，乃至一切種智如相？佛告須菩提：是色如，無生無滅、無住異，是名色如相；乃至一切種智如相，無生無滅、無住異，是名一切種智如相。是中菩薩摩訶薩應學。復次須菩提！菩薩摩訶薩知諸法實際時，知一切法略廣相。世尊！何等是諸法實際？佛言：無際，是名實際。菩薩學是實際，知一切諸法略廣相。須菩提！若菩薩摩

訶薩知諸法法性，是菩薩能知一切法略廣相。世尊！何等是諸法法性？佛言：色性，是名法性，是性無分，無非分。須菩提！菩薩摩訶薩，知法性故，知一切法略廣相。須菩提白佛言：世尊！復云何應知一切法略廣相？佛言：若菩薩摩訶薩知一切法，不合不散。須菩提言：世尊！何等法不合不散？佛言：色不合不散，受想行識不合不散，乃至一切種智不合不散；有為性無為性，不合不散。何以故？是諸法自性無，云何有合有散？若法自性無，是為非法，法與非法不合不散。如是應當知一切法略廣相。須菩提言：世尊！是名菩薩摩訶薩略攝般若波羅蜜。世尊！是略攝般若波羅蜜中，初發意菩薩摩訶薩應學，乃至十地菩薩摩訶薩，亦應學。是菩薩摩訶薩學是略攝般若波羅蜜，則知一切法略廣相。

世尊！是門，利根菩薩摩訶薩能入。佛言：鈍根菩薩亦可入是門，中根菩薩散心菩薩亦可入是門；是門無礙，若菩薩摩訶薩一心學者，皆入是門。懈怠少精進、妄憶念亂心者，所不能入；精進不懈怠、正憶念攝心者，能入。欲住阿鞞跋致地，欲逮一切種智者，能入。是菩薩摩訶薩，如般若波羅蜜所說當學，乃至如檀波羅蜜所說當學；是菩薩摩訶薩當得一切智。是菩薩摩訶薩行般若波羅蜜，所有魔事，欲起即滅。以是故，菩薩摩訶薩，欲得方便力；當行般若波羅蜜。若菩薩摩訶薩如是行，如是習，如是修般若波羅蜜，是時無量阿僧祇國土中現在諸佛，念是行般若波羅蜜菩薩。何以故？是

般若波羅蜜中，生過去未來現在諸佛故。以是故，菩薩摩訶薩應如是思惟：過去未來現在諸佛所得法，我亦當得。如是須菩提！菩薩摩訶薩應習般若波羅蜜！若如是習般若波羅蜜，疾得阿耨多羅三藐三菩提。以是故，菩薩摩訶薩，常應不遠離薩婆若念。若菩薩摩訶薩如是行般若波羅蜜，乃至彈指頃，是菩薩福德甚多。若有人教三千大千國土中眾生，自恣布施，教令持戒禪定智慧，教令得解脫、解脫知見，教令得須陀洹果，乃至阿羅漢果、辟支佛道，不如是菩薩修般若波羅蜜，乃至彈指頃。何以故？是般若波羅蜜中，生布施持戒禪定智慧，須陀洹果，乃至辟支佛道。十方現在諸佛，亦從般若波羅蜜中生；過去未來諸佛，亦從般若波羅蜜中生故。復次須菩提！菩薩摩訶薩應薩婆若念，行般若波羅蜜，若須臾時，若半日，若一日，若一月，若百日，若一歲，若百歲；若一劫，若百劫，乃至無量無邊阿僧祇劫；是菩薩修是般若波羅蜜，福德甚多；勝於教十方恆河沙等世界中眾生布施持戒、禪定智慧、解脫、解脫知見；教令得須陀洹果，乃至辟支佛道。何以故？諸佛從般若波羅蜜中生，說是布施持戒、禪定智慧、解脫、解脫知見，須陀洹果，乃至辟支佛道。

若有菩薩摩訶薩如般若波羅蜜所說住，當知是菩薩摩訶薩是阿鞞跋致，為諸佛所念。如是方便力成就，當知是菩薩，親近供養無量千萬億諸佛，種善根，與善知識相隨；久行六波羅蜜，久修十八空、四念處，乃至八聖道分，佛十力，乃至

一切種智。當知是菩薩住法王子地，滿足諸願，常不離諸佛，不離諸善根，從一佛國，至一佛國。當知是菩薩辯才無盡，具足陀羅尼；身色具足，受記具足故，為眾生受身。當知是菩薩善知字門，善知非字門；善於言，善於不言；善於一言，善於二言，善於多言；善知女語，善知男語；善知色，乃至識；善知世間性，善知涅槃性；善知法相，善知有為相，善知無為相；善知有法，善知無法；善知自性，善知他性；善知合法，善知散法；善知相應法，善知不相應法，善知相應不相應法；善知如，善知不如；善知法性，善知法位；善知緣，善知無緣；善知陰，善知界，善知入；善知四諦，善知十二因緣；善知四禪，善知四無量心，善知無色定；善知六波羅蜜，善知四念處，乃至善知一切種智；善知有為性，善知無為性；善知有性，善知無性；善知色觀，善知受想行識觀，乃至善知一切種智觀；善知色、色相空，善知受想行識、識相空，乃至善知菩提、菩提相空；善知捨道，善知不捨道；善知生，善知滅，善知住異；善知欲，善知瞋，善知癡；善知不欲，善知不瞋，善知不癡；善知見，善知不見；善知邪見，善知正見，善知一切見；善知名，善知色，善知名色；善知因緣，善知次第緣，善知緣緣，善知增上緣；善知行相；善知苦，善知集，善知滅，善知道；善知地獄，善知餓鬼，善知畜生，善知人，善知天；善知地獄趣，善知餓鬼趣，善知畜生趣，善知人趣，善知天趣；善知須陀洹，善知須陀洹果，善知須陀洹道；善知斯陀含，善知斯陀含果

，善知斯陀含道；善知阿那含，善知阿那含果，善知阿那含道；善知阿羅漢，善知阿羅漢果，善知阿羅漢道；善知辟支佛，善知辟支佛果，善知辟支佛道；善知佛，善知一切種智，善知一切種智道；善知諸根，善知諸根具足；善知慧，善知疾慧，善知有力慧，善知利慧，善知出慧，善知達慧，善知廣慧，善知深慧，善知大慧，善知無等慧，善知實慧；善知過去世，善知未來世，善知現在世；善知方便，善知待眾生；善知心，善知深心；善知義，善知語；善知分別三乘。須菩提！菩薩摩訶薩行般若波羅蜜，生般若波羅蜜，修般若波羅蜜，得如是等利益。

願以此功德 莊嚴佛淨土 上報四聖恩 下濟六凡苦
所有法界眾 悉修菩提行 盡此一報身 同生極樂國